

SEJARAH AWAL KETAMADUNAN LUAK JELEBU

Oleh: **Dr. Muhammad Firdaus bin Haji Abdul Manaf & Dr. Haji Mohd. Kamel bin Mat Salleh**
Pensyarah Kanan Akademi Pengajian Islam Kontemporari. UiTM Cawangan Negeri Sembilan

Luak Jelevu merupakan salah satu Luak Berundang di Negeri Sembilan. Pembentukan luak ini melalui tempoh cukup lama iaitu bermula seawal termeterainya perjanjian dengan pihak kolonial. Sepanjang tempoh sebelum wujudnya Luak Jelevu di bawah perjanjian tersebut, sejarah luak ini dianggap amat misteri hingga wujudnya istilah *'Dynastic of Myth'*.

Hal ini menggambarkan bahawa Sejarah Jelevu begitu misteri dan sukar dibongkar. Ia dianggap sukar untuk diteliti dan dikaji kerana kekurangan bahan-bahan rujukan serta data-data yang sahih terutamanya daripada pihak kolonial sendiri. Hal ini menyebabkan berlakunya simpang-siur dalam penceritaan sejarah dan memberikan kesan yang cukup mendalam terhadap pembinaan jati diri sebahagian masyarakat di luak ini. Kesannya, pengaruh-pengaruh asing dianggunkan sedangkan luak ini mempunyai nilai sejarahnya yang tersendiri dengan pembentukan struktur pentadbiran seawal tahun 1440-an Masihi lagi dan pernah mencapai kemuncak tamadun kerajaannya dengan kestabilan politik, sosial dan ekonomi serta berjaya menjadi mercu tanda keagungan Islam sekitar tahun 1600-an Masihi.

Tambahan pula, sebahagian pendapat menyebut bahawa Luak Jelevu diasaskan sebagai salah sebuah kerajaan dari Luak Nan Sembilan, seawal abad ke-13 Masihi lagi yang sama berdiri dengan kota-kota Kerajaan Melayu Lama lain seperti Pan-pan, Chih-Tu, Tanjung Pura, Ligor, Lembah Taraqun dan Indra Pura. Malah, Luak Jelevu merupakan salah sebuah pemerintahan berkeluarga yang telah ribuan tahun berdiri, pencapaian kemajuan yang lebih awal dan lebih tinggi ketamadunannya. Hal ini jelas dilihat pada peletakan nama Jelevu itu sendiri apabila kedudukannya sebagai Pusat Perairan Strategik dengan kewujudan jawatan YM Dato' Berdurai atau *Wizurai* iaitu Ketua Turus Angkatan Panglima Perang yang turut digunakan oleh Pemerintah Sardinia dan Corsica dalam Kerajaan Aragon seawal abad ke-13 Masihi. Dalam masa yang sama, penggunaan kuku 'Changgai' oleh permaisuri-permaisuri Maharaja China yang juga digunakan oleh isteri YM Dato' Berdurai sehingga dikenali sebagai Batin Berchanggai Besi, menjadi 'Pusat Persinggahan Utama' oleh pemerintah daripada Kerajaan-kerajaan Melayu Lama. Selain itu, ia turut menjadi 'Pusat Dakwah Nusantara' sehingga dikunjungi oleh tokoh-tokoh ulama termasuklah dalam kalangan Wali Songo, YM Kadi Padang Genting Malim Kalimun al-Sakandarī al-Shāzuli, YM Raja Khatib, Sunan Bonang al-Naqshabandi, Sunan Muria al-Shattāri, Waliyullah Masyriq, Sayyid Ahmad Husayn al-Jufri al-'Alāwi dan lain-lain lagi.

Aktiviti perdagangan di perairan Luak Jelevu yang pesat ketika itu menyebabkan DYMM Dato' Mendelika Menteri Akhirulzaman Sultan Jelevu iaitu Dato' Moyang Salleh mengurniakan jawatan YM Dato' Shahbandar kepada sepupunya iaitu YM Dato' Sohor, susulan perkenan DYMM Sultan Muazzam Shah dari Kerajaan Johor yang mengurniakan sebuah cop dan 'Kuasa Mengutip Cukai' di perairan Jelevu kepada YM Dato' Shahbandar Sohor yang akhirnya dikenali

sebagai 'Pucuk, Bulat, Waris Di Air, Tumpuan Tua Segala Dagang'. Peristiwa ini dapat dilihat dengan lebih jelas lagi dalam peristiwa 'Pemutusan Tali Ke Johor' oleh DYMM Dato' Moyang Salleh. Jawatan YM Dato' Shahbandar itu kemudiannya pesaka yang diwarisi daripada satu generasi ke generasi seterusnya, sehinggalah sampai ke hari ini. Gelaran Duli Yang Maha Mulia (DYMM) sepatutnya dinisbahkan kepada Dato' Moyang Salleh kerana ia adalah selari dengan jawatannya sebagai Sultan Jelevu sebagaimana yang termaktub dalam cop kurnia DYMM Sultan Muazzam Shah. Wakil kepada Pegawai British Pertama di Daerah Jelevu iaitu H.A. O'Brien yang dihantar oleh Gabenor British Negeri Selat pada tahun 1883 Masihi menyifatkan tulisan pada cop tersebut dengan kata-kata beliau *'The Sultan Mu'azzam Shah confers upon the Mandelika Menteri supreme authority to be the Sultan of Jelevu for ever'*.

Tulisan beliau tersebut membawa maksud iaitu, '**Sultan Muazzam Shah menjunjung kebesaran kepada Menteri Akhirulzaman kuasa tertinggi menjadi Sultan Jelevu yang Mendelika (berkuasa penuh dalam pentadbirannya) selamanya'**. Hal ini menyebabkan pentadbiran dalam luak ini juga turut dikenali sebagai 'Pemerintahan Bergajah Tunggal' yang bermaksud pemerintahan tersendiri dan tidak berada di bawah mana-mana kuasa pemerintahan yang lain. Namun begitu, anehnya gelaran 'Sultan Jelevu' ini tidak digunakan oleh DYMM Dato' Moyang Salleh dan Dato'-dato' Undang selepasnya. Hal ini menyebabkan penulis sendiri berasa bingung hendak menisbahkan gelaran kehormat khususnya kepada Dato' Moyang Salleh. Apakah cukup memadai dengan Yang Teramat Mulia (YTM) sebagai Dato' Undang Luak Jelevu Pertama atau sepatutnya dengan gelaran Duli Yang Maha Mulia (DYMM) Paduka Baginda atas kedudukannya sebagai Sultan Jelevu yang pertama?.

Hal ini memperlihatkan sikap rendah diri DYMM Dato' Moyang Salleh yang amat luar biasa, yang dimiliki oleh orang-orang Sufi dan para Wali Allah SWT. Oleh yang demikian, penulis mempercayai kisah-kisah luar biasa yang dikaitkan dengan DYMM Dato' Moyang Salleh bukanlah kerana pendampingnya dalam kalangan Jin dan sebagainya. Sebaliknya, ia adalah anugerah daripada Allah SWT kepada hamba-hamba pilihanNya yang disebut sebagai 'Keramat', bertepatan dengan namanya iaitu 'Salleh'. Penulis beranggapan bahawa cerita yang didengari berkaitan sejarah Jelevu dengan Jin dan sihir sebenarnya percubaan menjatuhkan Luak Jelevu sebagai 'Luak Pilihan Tuhan'. Manakala gelaran Yang Mulia (YM) kepada Dato' Shahbandar pula adalah selari dengan jawatannya sebagai salah seorang YM Dato' Lembaga di luak ini (Terjali, 1967).

Jelevu mencapai kemuncak tamadun yang tinggi sekitar tahun 1600 Masihi sehingga 1750 Masihi. Pada ketika itu, Jelevu sudah mempunyai sistem pentadbiran, ketenteraan, ekonomi, perdagangan, pendidikan dan sosial yang tersendiri. Jelevu menjadi pusat persinggahan strategik para pedagang yang hendak ke mana-mana tempat di Tanah Semenanjung dengan

menggunakan Sungai Pahang, Sungai Kenaboi, Sungai Teriang, Denai Penarikan, Sungai Muar dan banyak lagi. Hal ini secara langsung menjadikan Jelevu sebagai pusat tumpuan di sebelah darat oleh kebanyakan Raja, Sultan, Pemerintah, Batin daripada pelbagai bangsa dan suku kaum manusia daripada Minangkabau, Bugis, Pasai, Majapahit, Srivijaya, Langkasuka, Champa, Kesultanan Melayu Melaka, Arab dan lain-lain lagi.



Gambar: Cop Kurnia DYMM Sultan Johor yang mengiktiraf Dato' Moyang Salleh sebagai Duli Yang Maha Mulia Sultan Jelevu Pertama

Kepesatan tamadun Jelevu ketika itu amat dikagumi dan dapat bertahan tanpa gangguan sebarang kuasa luar kerana kecekapan pentadbiran serta ketenteraannya. Selain itu, terdapat banyak tokoh agama yang hadir telah dikesan. Antaranya ialah Kadi Padang Genting Malim Kalimun al-Sakandari al-Shāzuli, Khatib Meraja, Sunan Bonang al-Naqshabandī (1465-1524 Masihi), Sunan Muria al-Shattāri, Waliyullah Masyriq dan Sayyid Ahmad Husayn al-Jufri al-'Alāwī. Menariknya, ketamadunan yang dicapai ketika itu dipercayai mempunyai kaitan dengan penggunaan nama Jelevu untuk luak ini sampailah sekarang. Keterangannya adalah seperti berikut:

a. Perkataan Jelevu berasal daripada kata nama bahasa Arab iaitu Jalabun yang bermaksud tempat berkumpul para pimpinan. Manakala, kata kerja dalam bahasa Arabnya pula ialah *Jalabū* yang bermaksud mereka (pimpinan) berkumpul di sesuatu tempat (Lisān al-'Arab, 2000 & Kamus Besar Arab Melayu Dewan, 2006). Hal ini bersesuaian dengan luak ini yang terkenal sebagai tempat berkumpulnya para pendakwah, alim dan tokoh Sufi seperti Kadi Padang Genting, Khatib Meraja, Sunan Gresik, Sunan Bonang, Sunan Muria, Waliyullah Masyriq, Sayyid Ahmad Husayn, Sayyid Zayn al-'Ābidin dan lain-lain lagi. Para pembesar pula terdiri daripada Baginda Maharaja Alif Khalifatullah, Baginda Permaisuri Ambang Sari dan pembesar-pembesar lain daripada Minangkabau, Bugis, Rawo dan *Ahl al-Bayt*.

b. Kata nama bahasa Arab *Jalabun* juga membawa maksud 'tempat perlabuhan' atau 'berdagang'. Manakala, kata kerjanya ialah *Jalabū* yang bermaksud 'para pedagang berniaga di sebuah pelabuhan' atau 'tempat khusus berniaga' (Lisān al-'Arab, 2000 & Kamus Besar Arab Melayu Dewan, 2006). Hal ini bertepatan dengan kedudukan Jelevu sebagai 'Tumpuan Tua Segala Dagang' melalui laluan aliran Sungai Teriang yang menghubungkan antara Sungai Pahang dengan Sungai Kenaboi, Denai Penarikan dan Sungai Muar. Kesesakan laluan air ini digambarkan mengikut perjalanan Parameswara yang membuka Melaka pada tahun 1263 M telah melalui aliran sungai-sungai ini berdasarkan petikan Negara Kertagama (Pupuh 14):

"Di hujung Medini Pahang yang disebut paling dahulu, berikut Langkasuka, Saimwang, Kelantan serta Terengganu, Johor, Paka, Muar, Dungun, Tumasik serta Sening Hujung, Kelang serta Kedah, Jerai, Kanjapiniran, semua sudah lama terhimpun"

Ketika itu, Kuala Klawang dijadikan sebagai pusat laluan. Hal ini berdasarkan kedudukan Masjid Lama Kuala Klawang dikenali sebagai 'Masjid Dagang' oleh penduduk setempat kerana dipercayai para pedagang dahulu melabuhkan kapal-kapal mereka untuk berdagang, berehat dan kutipan cukai dilakukan di persimpangan sungai yang berhampiran dengan masjid tersebut yang berhampiran dengan Bukit Tengger di Pekan Kuala Klawang sekarang. Kepesatan perdagangan ketika itu menyebabkan Lembaga Waris Anak Dagang di Hulu dan Lembaga Waris Anak Dagang di Hilir diwujudkan bagi menyelaraskan sistem pentadbiran Waris Anak Dagang ketika itu.

c. Kata nama bahasa Arab *Jalabun* juga membawa maksud 'bising'. Manakala, kata kerjanya ialah *Jalabū* yang bermaksud 'menempik' (Lisān al-'Arab, 2000 & Kamus Besar Arab Melayu Dewan, 2006). Hal ini menggambarkan kepadatan luak ini sebagai tempat pelabuhan semua pedagang yang berlabuh dengan penuh sesak.

d. Kata nama bahasa Arab *Jalabun* juga membawa maksud 'kubu' atau 'tempat berlindung daripada musuh'. Manakala, kata kerjanya ialah *Jalabū* yang bermaksud 'melindungi dengan kubu' (Lisān al-'Arab, 2000 & Kamus Besar Arab Melayu Dewan, 2006). Hal ini menggambarkan sistem pemerintahan yang diamalkan oleh luak ini memberikan jaminan keselamatan kepada para pedagang berdasarkan faktor muka buminya yang bergunung-ganang menyerupai sebuah kubu yang besar.

Oleh kerana luak ini cukup terkenal dengan kehadiran para pendakwah, para pembesar dan pedagang yang begitu ramai dengan kepelbagaian latar belakang dialek dan slanga bahasa, akhirnya perkataan *Jalabū* berubah kepada nama 'Jelevu'.



Makam YM Dato' Mentunggang, YM Dato' Gombak, YM Mayang Aceh, YM Mayang Angsa dan YM Dato' Raja Balang Long



Masjid Warisan Kariah Kg. Peninjau yang berusia lebih 500 tahun, dianggap sebagai 'Masjid Keramat' dan tertua di Negeri Sembilan menjadi sebahagian kawasan Istana DYMM Dato' Mendika Menteri Akhirulzaman Sultan Jelevu I, Dato' Moyang Salleh